



REPUBLIKA E SHQIPËRISË  
KOMISIONERI PËR MBIKËQYRJEN E SHËRBIMIT CIVIL

Nr. 489 Prot.

Tiranë, më 28.04.2025

Lënda: Në vëmëndjen tuaj, në lidhje me vlerësimin e sjelljes së nëpunësve civilë, në rastet e publikimit prej tyre të veprimtarive zgjedhore në rrjetet sociale.

**NJËSISË SË ADMINISTRIMIT TË BURIMEVE NJERËZORE  
PËR TË GJITHA INSTITUCIONET QË JANË PJESË E SISTEMIT TË  
SHËRBIMIT CIVIL**

**GRUPIT TË MONITORIMIT**

Në vijim të procesit të monitorimit të sjelljes së nëpunësve civilë gjatë periudhës zgjedhore, si dhe duke marrë shkak nga disa informacione të ardhura pranë Komisionerit nga subjekte të caktuara politike, pjesëmarrëse në këtë proces zgjedhor, ku pretendohen shkelje të disiplinës në shërbimin civil, nga ana e disa nëpunësve civil, nëpërmjet pjesëmarrjes aktive në fushatë elektorale apo publikimeve të veprimtarive zgjedhore në rrjetet e tyre sociale, sjellim edhe njëherë në vëmëndjen tuaj të drejtat dhe detyrimet politike që kanë nëpunësit civilë, të cilat duhet të respektohen nga ana e tyre, gjatë kryerjes së detyrës funksionale.

Në nenin 37 pika 1, të ligjit nr. 152/2013, “Për nëpunësin civil”, i ndryshuar, përcaktohet se: “Nëpunësi civil nuk mund të shprehë publikisht bindjet apo preferencat e tij politike”, e për këtë arsye, me qëllim që të kuptohet drejt përmbajtja e kësaj dispozite, Komisioneri ka hartuar dhe dërguar pranë institucioneve që punësojnë nëpunës civil, një udhëzues ku janë dhënë sqarime të hollësishme që kanë të bëjnë me të drejtat dhe detyrimet e nëpunësve civilë, sidomos gjatë periudhës zgjedhore.

Ashtu si është evidentuar edhe në udhëzimet e Komisionerit, nisur nga një përcaktim i përgjithshëm që mund ti bëjmë rrjeteve sociale apo platformave sociale si, “Facebook”, “Twitter”, “Instagram”, “WhatsApp”, etj., ato mund të konsiderohen si “sheshe virtuale”, të shprehjes së bindjeve apo preferencave politike. Këto mjete komunikimi të japin mundësi reale, që duke përdorur teknologjinë e internetit, nëpërmjet llogarive personale, të vendosësh,

apo të ndash me të tjerët fotografi, filmime, mendime, lajme, reklama, propagandë politike etj., e në këtë këndvështrim, ato mund të shërbejnë si instrumenta efektive për të shprehur dhe mbështetur një preferencë politike, e cila është e ndaluar për nëpunësin civil.

Platforma të tilla tashmë janë masivisht të aksesueshme nga përdoruesi jo vetëm nëpërmjet kompjuterit, por edhe nga mjete të tjera elektornike si telefonat celular, të cilat e shpërndajnë informacionin gjerësisht dhe në një kohë shumë të shpejtë.

Por, nga ana tjetër, fakti që funksionimi i këtyre platformave, aktualisht nuk ka një rregullim ligjor të përcaktuar, e për pasojë, nuk ka një siguri të matshme që të lidhë emrin apo të dhënat e përdoruesit, me një person konkret, që mund të jetë edhe subjekt i ligjit për nëpunësin civil, kërkon një kujdes të veçantë në trajtimin e rasteve kur evidentohen publikime të ndaluara në rrjetet sociale.

Në këto kushte, Komisioneri vlerëson se përdorimi i rrjeteve sociale apo platformave sociale, ashtu si i analizuam më sipër, apo mjete të tjera të komunikimit elektronik, për qëllime të propagandimit apo shprehjes publike të bindjeve dhe preferencave politike të nëpunësit civil, është i ndaluar, në referencë të përcaktimit të pikës 1, të nenit 37 të ligjit 152/2013, “Për nëpunësin civil”, i ndryshuar.

Ndërkohë, Grupet e monitorimit, duhet të tregojnë vëmendje të posaçme, duke i konsideruar konstatimet e tyre apo denoncimet e ardhura për publikime në kundërshtim me ligjin në rrjete sociale, për një nëpunës civil, si një arsye për të hetuar paraprakisht, nëse kjo është një indicie e qënësishme për të nisur një ecuri disiplinore në ngarkim të subjektit të denoncuar. Kujdes duhet të tregohet sidomos në drejtim të saktësisimit të faktit, nëse subjekti i denoncuar është i njëjti person me përdoruesin e asaj llogarie në rrjet.

Sa më sipër, për të evidentuar këtë rrethanë që është bërë prezente në këtë moment të mbikëqyrjes, në aktet që materializojnë veprimtarinë e Grupit të Punës, që është ngritur nga institucioni për monitorimin e sjelljes së nëpunësve civilë gjatë procesit zgjedhor, Komisioneri çmon se duhet të përfshihet në rregulloren e brendshme të nxjerrë për këtë qëllim, edhe ndalimi i nëpunësit civil për të mos shprehur publikisht bindjet apo preferencat e tij politike, në rrjete apo portale sociale, në zbatim nenit 37, të ligjit 152/2013, “Për nëpunësin civil”, i ndryshuar.

Ky plotësim i rregullores, duhet t’i njoftohet të gjithë nëpunësve civilë të institucionit, të cilët duhet të jenë në dijeni për këtë rregull të cilin duhet ta respektojnë në të ardhmen.

Për rastet kur evidentohen veprime në kundërshtim me këtë rregull, njësia përgjegjëse dhe eprori i drejtpërdrejtë i nëpunësit dhe Komisioni i Disiplinës, duhet të vijojnë procedurën, sipas kërkesave në dispozitat përkatëse të ligjit për nëpunësin civil, ku rregullohet instituti i

disiplinës në shërbimin civil (nenet 57 deri 61, të ligjit nr. 152/2013 "Për nëpunësin civil", i ndryshuar).

Duke ju falenderuar për bashkëpunimin, Komisioneri është në mbështetjen tuaj me të gjitha mjetet ligjore, me qëllim që procesi i monitorimit të zhvillohet normalisht dhe në përputhje me ligjin.

KOMISIONERI

Pranvera Strakoşa

